

四庫全書

集部

欽定四庫全書

集部

御選唐宋詩醇卷

四十一

詳校官侍講<sub>臣</sub>王燕緒

主事銜<sub>臣</sub>徐以坤覆勘

總校官降調編修<sub>臣</sub>倉聖脉

校對官編修<sub>臣</sub>吳舒帷

謄錄監生<sub>臣</sub>薩龍光

欽定四庫全書

御選唐宋詩醇卷四十

眉山蘇軾詩九

目錄

次韻楊父尚書侍祠郊丘瞻望天光退而相慶引  
滿醉吟

郊祀慶成詩

僕所藏仇池石希代之寶也王晉卿以小詩借觀

意在於奪不敢不借然以此詩先之

晉卿示詩欲奪海石錢穆父王仲至蔣穎叔皆次  
韻穆至二公以為不可許獨穎叔不然今日穎叔  
見訪親覩此石之妙遂悔前語僕以謂晉卿豈可  
終閉不予者若能以韓幹二散馬易之者蓋可許  
也復次前韻

欲以石易畫晉卿難之穆父欲兼取二物穎叔欲  
焚畫碎石乃復次前韻并解二詩之意生日劉景

文以古畫松鶴為壽且旣佳篇次韻為謝  
程德孺惠海中柏石兼辱佳篇輒復和謝

送蔣穎叔帥熙河

次韻吳傳正枯木歌

送范中濟經畧侍郎分韻賦詩得先字且贈以魚  
枕杯四馬箠一以元戎十乘以先啟行為韻

書晁說之考牧圖後

七年九月自廣陵召還復館於浴室東堂八年六

月乞會稽將去汝公乞詩乃復用前韻三首

東府雨中別子由

書丹元子所示李太白真

次韻滕大夫雪浪石

鶴歎

子由生日以檀香觀音像及新合印香銀篆盤為  
壽一首

過高郵寄孫君孚

慈湖夾阻風五首

錄四首

過廬山下

壺中九華詩

秧馬歌

八月七月初入贛過惶恐灘

鬱孤臺

廉泉

塵外亭

天竺寺

月華寺

碧落洞

峽山寺

舟行至清遠縣見顧秀才極談惠州風物之美

廣州蒲澗寺

浴日亭

游羅浮山一首示兒子過



十月二日初到惠州

白水山佛跡巖

十一月二十六日松風亭下梅花盛開

新釀桂酒

江郊

正月二十四日與兒子過賴仙芝王原秀才僧曇  
頴行全道士何宗一同遊羅浮道院及栖禪精舍  
過作詩和其韻寄邁迨一首

贈王子直秀才

遊博羅香積寺

連雨漲江二首

四月十一日初食荔枝

六月十二日酒醒步月理髮而寢

荔枝歎

欽定四庫全書

御選唐宋詩醇卷四十

眉山蘇軾詩九

次韻穆父尚書侍祠郊丘瞻望天光退而相慶引

滿醉吟

千葦杞梓陰雲天樗散誰收老鄭虔喜氣到君浮白裏  
豐年及我挂冠前令嚴鐘鼓三更月野宿貔貅萬竈烟  
太息何人知帝力歸來金帛看赭肩

氣偉采奇望之又蔚然深秀厥由風力之適

復齋漫錄曰東坡言古今七言偉麗之句永叔一聯  
云蒼波萬古流不盡白鳥雙飛意自閒上句取李太  
白長波瀉萬古之句東坡一聯云令嚴鐘鼓三更月  
野宿貔貅萬竈烟上句取杜子美中天懸明月令嚴  
夜寂寥之句也

苕溪漁隱叢話曰東坡云七言之偉麗者子美云旌  
旗日暖龍蛇動宮殿風微燕雀高五更鼓角聲悲壯

三峽星河影動搖爾後寂寥無聞焉直至永叔云蒼  
波萬古流不盡白鳥雙飛意自閒萬馬不嘶聽號令  
諸番無事著耕耘可以並驅爭先矣先生亦云令嚴  
鐘鼓三更月野宿貔貅萬竈烟亦庶幾焉耳

郊祀慶成詩

帝出乘昌運天心予太平文章三代繼制作七年成大  
祀乾坤合剛辰日月明泰壇朝掃地魄寶夜垂精仰御  
圓蒼蓋環觀海嶽成北流吞朔易西極落欒槍升燎靈

光答回鑾瑞霧迎需雲徧枯槁解雨達句萌可頌非天  
德因箴亦下情民言知有酌帝謂本無聲富國由崇儉  
斯年在好生無心斯格物克已自銷兵化國安新政孤  
臣反舊耕還將清廟什留與野人賡

自元豐元年詳定郊祀禮文至六年冬至親祀圜丘以  
太祖配始罷天地合祭之禮元祐五年廷臣集議復定  
南郊並祀之儀七年親郊始行合祭宋制三年一郊軾  
以兵部尚書為南郊鹵簿使疏請嚴整儀仗一時稱盛

合祭之禮至紹聖元年仍議罷而軾則主合祭之說然  
合祭亦僅行於是年耳時宰執侍從進詩以賀故有是  
詩詩共十四韻而自可頌非天德以下俱作箴規之語  
此所謂因事納規不藉揚厲鋪張以矜其華藻也

僕所藏仇池石希代之寶也王晉卿以小詩借觀  
意在於奪不敢不借然以此詩先之

海石來珠宮秀色如蛾綠坡陀尺寸間宛轉陵巒足連  
娟二華頂空洞三茅腹初疑仇池化又恐瀛洲蹙殷勤

嶠南使餽餉淮東牧

自注僕在揚州程德孺自嶠南解官還以此石見遺得之喜

無寐與汝交不瀆盛以高麗盆藉以文登玉

自注僕以高麗所餉

大銅盆貯之又以登州海石如碎玉者附其足

幽光先五夜冷氣壓三伏老人

生如寄茅舍久未卜一夫幸可致千里常相逐風流貴

公子竄謫武當谷見山應已厭何事奪所欲欲留嗟趙

弱寧許負秦曲傳觀慎勿許間道歸應速

希代之寶實是寫得出末用秦歸趙璧恰與情事比附

意隨筆轉如脫彈丸



趙次公曰連娟二華頂空洞三茅腹二華太華少華也古人謂造化削成故於二華言頂三茅一名句曲山其腹中空虛別有天地日月載在真誥故於三茅則言腹也

詩說雋永曰李贇皇好石有謝臨海守寄石詩斗竒章亦好石洛中關地多得之刻文可辨近世東坡亦好之有仇池石程德孺所遺其詩云殷勤嶠南使餽餉淮東牧即今英石也

王晉卿示詩欲奪海石錢穆父王仲至蔣穎叔皆  
次韻穆至二公以為不可許獨穎叔不然今日穎  
叔見訪親覩此石之妙遂悔前語僕以謂晉卿豈  
可終閉不予者若能以韓幹二散馬易之者蓋可  
許也復次前韻

相如有家山縹緲在眉綠誰云千里還寄此一顰足平  
生錦繡腸蚤歲藜苳腹從教四壁空未遣兩峰感吾今  
況衰病義不忘樵牧逝將仇池石歸沂岷山瀆守子不

貪寶完我無瑕玉故人詩相戒妙語予所伏一篇獨異  
論三占從兩卜君家畫可數天驥紛相逐風驥掠原野  
電尾梢澗谷君如許相易是亦我所欲今朝安西守來  
聽陽關曲勸我留此峰他日來不速

丹經墨史拈出盡歸妙諦筆上生花

趙次公曰故人詩相戒指錢穆父王仲至之不欲予  
也一篇獨異論指蔣穎叔之欲予也書曰三人占則  
從二人之言故以錢王可從而蔣可違也來聽陽關

曲穎叔將別而行故云耳

欲以石易畫晉卿難之穆父欲兼取二物穎叔欲焚畫碎石乃復次前韻并解二詩之意

春冰無真堅霜葉失故綠鷄疑鵬萬里竄笑夔一足二豪爭攘袂先生一捧腹明鏡既無臺淨瓶何用甕盆山不可隱畫馬無由牧聊將置庭宇何必棄溝瀆焚寶真愛寶碎玉未忘玉久知公子賢出語耆年伏欲觀轉物妙故以求馬卜維摩既復捨天女還相逐授之無盡燈

照此久幽谷定心無一物法樂勝五欲三義吾鄉里萬

馬君部曲卧雲行歸休破賊看神速

自注晉卿將  
種常有此意

因有欲焚畫碎石者乃別為踢淨瓶燒木佛添出一重  
公案言下如有白毫大光應念來感豈止次韻之能怪  
變百出

趙次公曰三義吾鄉里言真山萬馬君部曲言真馬  
我有真山則將卧雲王有真馬則用破賊如此則假  
山不必愛畫馬不必取也

生日劉景文以古畫松鶴為壽且貺佳篇次韻為

謝

問子一室間寧有千里廓塵心洗長松遠意發孤鶴生  
朝得此壽死籍疑可落微言在參同妙契藏九籥故人  
有奇趣逸想寄幽壑霜枝謝寒暑雲翮無前却何須構  
明堂未羨巢阿閣緬懷別時語復作數日惡詩腴固堪  
食字瘦還可愕高標忽在眼清夢了如昨君今噲等伍  
志與湛輩各宜待相願言方為不朽託子雲老執戟長

孺終主爵吾當追松喬子亦鄙衛霍

松鶴為壽近於俗情乃寫得古趣洋溢固知才人之筆  
無所不可

程德孺惠海中柏石兼辱佳篇輒復和謝

嵐薰瘴染卻敷腴笑飲貪泉獨繼吳未欲連車收薏苡  
官教沈網取珊瑚不知庾嶺三年別收得曹溪一滴無  
但指庭前雙柏石要予臨老識方壺

施元之曰德孺名之元持節嶺南歸惠此石故詩皆

用嶺南事德孺時為主客郎中

送蔣穎叔帥熙河

并引

穎叔出使臨洮與穆父仲至同餞之各賦詩一篇以  
今我來思為韻致遄歸之意得我字

西方猶宿師論將不及我苟無深入計緩帶我亦可承  
明正須君文字粲藻火自薦雖云數留行終不果正坐  
喜論兵臨老付邊瑣新詩出談笑僚友困掀簸我欲歌  
杖杜楊柳方婀娜邊風事首鹵所得蓋么麼願為魯連



書一射聊城竒陰功在不殺結草酬魏顆

積其憤激發以詼諧起四句似謔似莊言語妙天下

次韻吳傳正枯木歌

天公水墨自竒絕瘦竹枯松寫殘月夢回疎影在東牕  
驚怪霜枝連夜發生成變壞一彈指乃知造物初無物  
古來畫師非俗士妙相實與詩同出龍眠居士本詩人  
能使龍池飛霹靂君雖不作丹青手詩眼亦自工識拔  
龍眠胸中有千駟不獨畫肉兼畫骨但當與作少陵詩

或自與君拈秃筆東南山水相招呼萬象入我摩尼珠  
盡將書畫散朋友獨與長鋏歸來乎

因吳詩而及李畫因歌枯木而及畫馬軒然而來翩然  
而往隨意所到總入元微

苕溪漁隱叢話曰東坡題伯時畫馬云龍眠胸中有  
千駟議者謂譏其無德而稱余意其不然如文與可  
善作墨竹故和筴簞谷云料得清貧饒太守渭濱千  
畝在胸中豈亦是譏之耶又山谷咏伯時虎脊天馬

圖亦云筆端那有此千里在胸中蓋言畫馬之妙得之於心應之於手若輪扁之斲輪也

送范中濟經畧侍郎分韻賦詩得先字且贈以魚枕杯四馬簪一以元戎十乘以先啟行為韻

梁李久樂禍自焚豈非天兩鼠鬪穴中一勝亦偶然謀初要百慮善後乃萬全廟堂選世將范氏真多賢仁風被宿麥綠浪搖秦川號令聳毛羽先聲落虛弦我家天一方去路城西偏投竿困障日賣劍行歸田贈君荆魚

杯副以蜀馬鞭一醉可以起毋令祖生先

謀初善後有無限經濟在中濟能不負此詩又以見其言必有中也

施元之曰中濟以廕歷官元祐八年知慶州中濟祖  
雍仁宗時為副樞李元昊叛拜鎮武節度使知延州  
又知永興軍故曰廟堂選世將范氏真多賢中濟在  
慶廣儲蓄城柵嚴守降羈黠羌推誠待下人樂為用  
書晁說之考牧圖後

我昔在田間但知羊與牛  
川平牛背穩如駕百斛舟  
舟行無人岸自移我卧讀書牛不知  
前有百尾羊聽我鞭聲如鼓輦  
我鞭不妄發視其後者而鞭之  
澤中草木長草木病牛羊尋山跨坑  
谷騰趨筋骨強烟簑雨笠長林下  
老去而今空見畫世間馬耳射東風  
悔不長作多牛翁

小雅無羊之詩宣王考牧也牛羊寢  
訛之狀牧人簑笠之容俄焉而麾忽  
然而夢維魚維旃變幻莫測詩格之

奇無踰於此矣不襲其詞而能得其意遥遥千古斯作之外誰其嗣音

七年九月自廣陵召還復館於浴室東堂八年六月乞會稽將去汝公乞詩乃復用前韻三首

乞郡三章字半斜廟堂傳笑眼昏花上人問我遲留意

待賜頭綱八餅茶

自注尚書學士得賜頭綱龍茶一斤今年綱到最遲

夢繞吳山卻月廊白梅盧橘覺猶香

自注杭州梵天寺有月廊數百間寺中多

白楊梅盧橘

會稽且作須臾意從此歸田策最良

東南此去幾時歸  
倦鳥孤飛豈有期  
斷送一生消底物  
三年光景六篇詩

首作託言待賜  
戀闕情深三作只是把詩消歲月之意  
道破便可發深省

茗溪漁隱叢話曰細色茶五綱凡四十三品形製各異共七千餘餅又有粗色茶七綱凡五品大小龍鳳併揀芽悉入龍腦和膏為團餅茶共四萬餘餅東坡題文公詩卷云待賜頭綱八餅茶即今粗色紅綾袋

餅八者是也

東府雨中別子由

庭下梧桐樹三年三見汝前年適汝陰見汝鳴秋雨去  
年秋雨時我自廣陵歸今年中山去白首歸無期客去  
莫歎息主人亦是客對牀定悠悠夜雨空蕭瑟起折梧  
桐枝贈汝千里行歸來知健否莫忘此時情

空清如話而情味無窮此較前初秋寄子由一章尤入  
神品



書丹元子所示李太白真

天人幾何同一漚謫仙非謫乃其游麾斥八極隘九州  
化為兩鳥鳴相酬一鳴一止三千秋開元有道為少留  
縻之不可矧肯求西望太白橫峨岷眼高四海空無人  
大兒汾陽中令君小兒天台坐忘身平生不識高將軍  
手污吾足乃敢瞋作詩一笑君應聞

筆歌墨舞實有手弄白日頂摩青穹之氣概足為白寫  
照矣後人刊詩有將此作分為兩首者特以平韻承

接之故然分則意象不昌豈惟不諳詩法且并其佳處失之觀集內儋州夜夢一詩猶用此體可以為証

天厨禁嚮曰太白贊一韻七句方換韻又是平聲其法不得雙殺雙殺者不得此法也

賀裳曰文人有一言使人升九天墮九淵者此類是也亦公自寫其傲岸之趣却令太白生面重開勝碑陰記一段文字遠甚

次韻滕大夫雪浪石

太行西來萬馬屯勢與岱嶽爭雄尊飛狐上黨天下脊  
半掩落日先黃昏削成山東二百郡氣壓代北三家村  
千峰石卷蠹牙帳崩崖鑿斷開土門竭來城下作飛石  
一礮驚落天驕魂承平百年烽燧冷此物僵卧枯榆根  
畫師爭摹雪浪勢天公不見雷斧痕離堆四面繞江水  
坐無蜀士誰與論老翁兒戲作飛雨把酒坐看珠跳盆  
此身自幻孰非夢故國山水聊心存  
勁氣不可斷來則山岑競舉止則壁岸無階

墨莊漫錄曰東坡師中山得黑石白脈如蜀孫位孫知微所畫石間奔流盡水之變又得白石曲陽為大盆以盛之激水其上名其室曰雪浪齋公自銘曰玉井芙蓉大八盆伏流飛空漱其根時有英州之命後謫惠州又徙海外故中山後政以公遷謫雪浪之名遂廢元符中始被北歸之命將至吳中張芸叟守中山葺治雪浪齋重安盆石

趙次公曰古所謂山東乃今之河北晉地蓋太行山

之東也山東二百郡正謂太行以東冀州之域矣代  
北則燕趙以往之地也

鶴歎

園中有鶴馴可呼我欲呼之立坐隅鶴有難色側睨予  
豈欲臆對如鵬乎我生如寄良畸孤三尺長脰閣瘦軀  
俛啄少許便有餘何至以身為子娛驅之上堂立斯須  
投以餅餌視若無憂然長鳴乃下趨難進易退我不如  
難進易退我不如此鶴歎所以作也却只於結處一句

收住中云豈欲臆對如鵬乎乃疑而問鶴之詞我生如  
寄四句便直代鶴作臆對語章法奇絕是為善學賈賦  
者

唐庚語錄曰東坡作病鶴詩嘗寫三尺長脰瘦軀闕  
其一字使任德翁輩下之數十字東坡徐出其稿蓋  
閤字也此字既出儼然如見病鶴矣

子由生日以檀香觀音像及新合印香銀篆槃為  
壽一首

旃檀婆律海外芬  
西山老臍柏所薰  
香螺脫麝來相羣  
能結縹緲風中雲  
一燈如螢起微焚  
何時度盡繆篆紋  
繚繞無窮合復分  
縣縣浮空散氤氲  
東坡持是壽卯君  
君少與我師皇墳  
旁資老聃釋迦文  
共厄中年點蠅蚊  
晚遇斯須何足云  
君方論道承華勲  
我亦旗鼓嚴中軍  
國恩未報敢不勤  
但願不為世所醺  
爾來白髮不可耘  
問君何時返鄉枌  
收拾散亡理放紛  
此心實與香俱君  
聞思大士應已聞

香難以形容偏為形容曲盡平時好以禪語入詩此詩偏只結句大士已聞一點真有如天花變現不可測識者在詩道中殆以從聞思修而入三摩地矣

王直方詩話曰蘇黃門以已卯生故東坡有卯君之語其以檀香觀音像遺黃門云持是壽卯君其出局偶書云傾杯不能飲待得卯君來其送王鞏詩云淚濕粉牋書不得憑君送與卯君看

過高郵寄孫君孚



過淮風氣清一洗塵埃容水木漸幽茂菰蒲雜游龍可  
憐夜合花青枝散紅茸美人遊不歸一笑當誰供故園  
在何處已偃手種松我行忽失路歸夢千山重聞君有  
負郭二頃收橫從卷野畢秋穫殷牀間夜春樂哉何所  
憂社酒粥面釀宦遊豈不好毋令到千鍾

極言景物清幽留連不能去而其人之足思自見感舊  
懷人風格最古 此詩出於南遷之時孫升亦遭貶謫  
篇中絕不露牢騷抑鬱之意津津乎其有遺味矣

劉延世孫公談圃序曰紹聖之改元也凡仕於元祐而貴顯者例皆竄貶湖南嶺表相望而錯趾惟閩郡獨孫公一人遷於臨汀公元祐時歷三院遷左史入中書為舍人危言讜論內外憚之已而忤時宰意以集賢殿修撰留守南都後遷天章閣待制其謫官也自南都為歸州遂以散秩謫臨汀公諱升字君孚高郵人

慈湖夾阻風五首

錄四首

捍索桅竿立嘯空  
篙師酣寢浪花中  
故應管蒯知心腹  
弱纜能爭萬里風

此生歸路愈茫然  
無數青山水拍天  
猶有小船來賣餅  
喜聞虛落在山前

日輪亭午汗珠融  
誰識南訛長養功  
暴雨過雲聊一快  
未妨明月卻當空

卧看落月橫千丈  
起喚清風得半帆  
且並水村歌側過  
人間何處不巉巖

荒灣旅泊却寫得即事皆可喜讀此數詩足以開豁塵襟

過廬山下

并引

予過廬山下雲物騰湧默有禱焉未午衆峰凜然故作是詩

亂雲欲覆山勢與飄風南羣嶺相應和勇往爭驂驪可憐蒼蔚中時出紫翠嵐鴈沒失東嶺龍騰見西龕一時供坐笑百態變立談暴雨破塊北清飈掃渾酣廓然歸

何處陋矣安足戡亭亭紫霄峰窈窕白石菴五老數松  
雪雙溪落天潭雖云默禱應顧有移文慙

雲巒新霽氣象萬千列秀青青已見廬山真面目矣

壺中九華詩

并引

湖口人李正臣蓄異石九峰玲瓏宛轉若牕櫺然予  
欲以百金買之與仇池石為偶方南遷未暇也名之  
曰壺中九華且以記之

清溪電轉失雲峰夢裡猶驚翠掃空五嶺莫愁千嶂外

九華今在一壺中天池水落層層見玉女牕明處處通  
念我仇池太孤絕百金歸買碧玲瓏

詩亦宛轉玲瓏與題恰稱

趙次公曰劉禹錫有歌云九華山自是造化一尤物  
焉能藉甚乎人間今先生以石有九峰遂以名之其  
在一壺中則神仙壺公之壺也中別有天地山川故  
云耳

秧馬歌

并引

過廬陵見宣德郎致仕曾君安止出所作禾譜文既  
溫雅事亦詳實惜其有所缺不譜農器也予昔遊武  
昌見農夫皆騎秧馬以榆棗為腹欲其滑以楸桐為  
背欲其輕腹如小舟昂其首尾背如覆瓦以便兩髀  
雀躍於泥中繫束薰其首以縛秧日行千畦較之偃  
偻而作者勞佚相絕矣史記禹乘四載泥行乘橈解  
者曰橈形如箕擲行泥上豈秧馬之類乎作秧馬歌  
一首附於禾譜之末云

春雲濛濛雨淒淒春袂欲老翠剡齊嗟我婦子行水泥  
朝分一壠暮千畦腰如筍篴首啄雞筋煩骨殆聲酸嘶  
我有桐馬手自提頭尻軒昂腹脇低背如覆瓦去角圭  
以我兩足為四蹠聳踊滑汰如鳧鷖纖纖束藁亦可齎  
何用繁纓與月題卻從畦東走畦西山城欲閉聞鼓鼙  
忽作的盧躍檀溪歸來挂壁從高栖了無芻秣飢不啼  
少壯騎汝逮老鰥何曾蹶軼防顛隤錦韉公子朝金閨  
笑我一生跼牛犁不知自有木駃騠



直以馬喻非馬瑰偉連犴其說能解人顧

砮溪詩話曰東坡遊武昌嘗作秧馬歌唐子西至羅浮始識此器作詩云擬向明時受一廛著鞭常恐老農先行藏已問吾能識從此馳名四十年亦巧於用事

周必大農器譜序曰紹聖初元蘇文忠公軾南遷過太和邑人宣德郎致仕曾公安止獻所著禾譜文忠美其溫雅詳實為作秧馬歌又惜其不譜農器時曾

公已喪明不暇為也後百餘年其侄孫耒陽令之謹  
始續成之凡耒耜耨鑄車戽簞笠鉏刈篠簣杵臼斗  
斛釜甑倉庾厥類惟十附以禘記勒成三卷皆考之  
經傳參合今制無不備者是可補伯祖之書成蘇公  
之志矣

八月七月初入贛過惶恐灘

七千里外二毛人十八灘頭一葉身山憶喜懼勞遠夢

自注蜀道有錯喜  
歡舖在大散關上

地名惶恐泣孤臣長風送客添帆腹

積雨浮舟減石鱗便合與官充水手此生何止略知津  
起二句固是同調柳州書作發端乃更警策按十八灘  
自下而上第一灘在萬安縣前名黃公灘東坡改作惶  
恐以對喜歡其後文文山更以惶恐對零丁遂成典故  
結處云充水手者應是暗用何易於腰笏引舟事也

碧溪詩話曰柳詩十一年前南渡客四千里外北歸  
人又一身去國六千里萬死投荒十二年蘇詩七千  
里外二毛人十八灘頭一葉身不約而合句法使然

故也

鬱孤臺

自注以下四首皆虔州

八境見圖畫鬱孤如舊游山為翠浪湧水作玉虹流日  
麗崆峒曉風酣章貢秋丹青未變葉鱗甲欲生洲嵐氣  
昏城樹灘聲入市樓烟雲侵嶺路草木半炎州故國千  
峰外高臺十日留他年三宿處準擬繫歸舟

廉泉

水性故自清不清或撓之君看此廉泉五色爛摩尼廉

者謂我廉我以此名為有廉則有貪有慧則有癡誰為  
柳宗元孰是吳隱之漁父足豈潔許由耳何緇紛然立  
名字此水了不知毀譽有時盡不知無盡時竭來廉泉  
上捋鬚看鬚眉好在水中人到處相娛嬉

有盡在人無盡在我維摩經言有法門名無盡燈此詩  
所本

### 塵外亭

楚山澹無塵  
賴水清可厲  
散策塵外遊  
麾手謝此世山

高惜人力十步輒一憩卻立浮雲端俯視萬井麗幽人  
宴坐處龍虎為斬薙馬駒獨何疑豈墮山鬼計夜垣非  
助我謬敬欲其逝戲留一轉語千載起攘袂

韓詩云崎嶇上軒昂始得觀覽富未及此之圓妙也正  
諦既得故後幅但就馬祖事言之不更為山水饒舌

趙次公曰幽人宴坐處以下八句皆是馬祖事馬祖  
始居此山山鬼為築垣自謂修行不至為鬼所識乃  
舍去今先生詩語高馬祖一著也

天竺寺 并引

予年十二先君自虔州歸謂予言近城山中天竺寺  
有樂天親書詩云一山門作兩山門兩寺元從一寺  
分東澗水流西澗水南山雲起北山雲前臺花發後  
臺見上界鐘清下界聞遙想吾師行道處天香桂子  
落紛紛筆勢竒逸墨跡如新今四十七年予來訪之  
則詩已亡有刻石存耳感涕不已而作是詩

香山居士留遺跡天竺禪師有故家空詠連珠吟疊壁

已亡飛鳥失驚蛇  
林深野桂寒無子  
雨浥山薑病有花  
四十七年真一夢  
天涯流落淚橫斜

點染處極其古秀  
揭朗標華較香山  
聯珠體詩更進一  
格

月華寺

自注寺鄰本水場施者皆  
坑戶也百年間蓋三焚矣

天公胡為不自憐  
結土融石為銅山  
萬人探斲富媪泣  
祇有金帛資豪姦  
脫身獻佛意可料  
一瓦坐待千金還  
月華三火豈天意  
至今爰舍依榛菅  
僧言此地本龍象



興廢反掌曾何艱高巖夜吐金碧氣曉得異石青爛斑  
坑流窟發錢湧地莫施百鎰朝千鍰此山出寶以自賊  
地脈已斷天應慳我願銅山化南畝爛漫黍麥蘇惇鰥  
道人修道要底物破鎗煮飯茹三間

亦是左傳象齒焚身莊子山木自冠之意說來警動倍  
覺氣象崢嶸

李必恒曰智度論云水行中龍陸行中象故荷大法  
力比之龍象按月華寺智藥三藏真身在焉故有龍

象之語

碧落洞

槎牙亂峰合晃蕩絕壁橫遙知紫翠間古來仙釋并陽  
崖射朝日高處連玉京陰谷叩白月夢中遊化城果然  
石門開中有銀河傾幽龕入窈窕別戶穿虛明泉流下  
珠琲乳湍交縵纓我行畏人知恐為仙者迎小語輒響  
蒼空山自雷驚策杖歸去來治具煩方平

氣交冲漠與神為徒小語響蒼二句寫巖洞之景未經

人道

苕溪漁隱叢話曰題碧落洞詩云小語輒響蒼空山  
白雲驚此語全類李太白今印本誤作自雷驚不惟  
無意味兼與上句重疊也

李必恒曰一統志云洞多懸石如霓旌羽蓋旁有小  
洞號雲華深不可測按詩所云幽龕別戶即指其處  
也

峽山寺

自注傳奇所記孫恪秉氏事  
即此寺至今有人見白猿者

天開清遠峽地轉凝碧灣我行無遲速攝衣步孱顏山  
僧本幽獨乞食况未還雲碓水自春松門風為關石泉  
解娛客琴筑鳴空山佳人劍翁孫遊戲暫人間忽憶嘯  
雲侶賦詩留玉環林深不可見霧雨霾髻鬟

空山無人水流花開良由妙造自然匪關思索而致

裴硯傳奇曰廣德中有孫恪者游洛中遇袁氏女遂  
納為室後十餘年同至峽山寺素氏欣然改服理鬢  
詣老僧乃持一碧玉環獻僧曰此是院舊物僧初不

曉及齋罷有野猿數十悲嘯捫蘿而躍袁氏惻然俄  
命筆題詩云無端變化幾湮沉剛被恩情役此心不  
如逐伴歸山去長嘯一聲烟霧深詩畢遂裂衣化為  
老猿追嘯者躍樹而去老僧方悟曰乃貧道為沙門  
時所養者碧玉環則胡人所施繫於其頸者

舟行至清遠縣見顧秀才極談惠州風物之美

到處聚觀香案吏此邦宜著玉堂仙江雲漠漠桂花溼  
梅雨脩脩荔子然聞道黃柑常抵鵲不容朱橘更論錢

恰從神武來弘景便向羅浮覓稚川

八句屬對律詩正格筆力積健為雄頡頏杜老

廣州蒲澗寺

自注地產菖蒲十二節相傳安期生之故居始皇訪之於此

不用山僧導我前自尋雲外出山泉千章古木臨無地  
百尺飛濤瀉漏天昔日菖蒲方士宅後來簷蔔祖師禪

而今只有花含笑笑道秦王欲學仙

自注山中多含笑花

浴日亭

自注在南海廟前

劍氣崢嶸夜挿天瑞光明滅到黃灣坐看暘谷浮金暈

遙想錢塘涌雪山已覺滄涼蘇病骨更煩沆瀣洗衰顏  
忽驚鳥動行人起飛上千峰紫翠間

前六句猶是滄滄涼涼之勢忽驚鳥動一轉陡然而上

筆勢奇絕

游羅浮山一首示兒子過

人間有此白玉京羅浮見日雞一鳴

自注劉夢得有詩  
記羅浮夜半見日

事山不甚高而夜  
見日此可異也

南樓未必齊日觀鬱儀自欲朝朱明

自注山有二石樓今延祥寺在南樓下朱  
明洞在冲虛觀後云是蓬萊第七洞天

東坡之師抱

朴老真契久已交前生玉堂金馬久流落寸田尺宅今

誰耕道華亦嘗啖一棗

自注唐永樂道士侯道華竊食鄧天師藥仙去永樂有無核棗

人不可得道華獨得之予在岐下亦嘗得食一枚

契虛正欲仇三彭

自注唐僧契虛遇人

導游稚川仙府真人問曰汝絕三彭之仇乎契虛不能答

鐵橋石柱連空橫

自注山有鐵橋

石柱人罕至者

杖藜欲趁飛猿輕雲溪夜逢瘡虎伏

自注山有瘡虎巡山

斗壇畫出銅龍吟

自注冲虛觀後有朱真人朝斗壇近於壇上獲銅龍六銅魚一

小兒

少年有奇志中宵起坐存黃庭近者戲作凌雲賦筆勢

彷彿離騷經負書從我盍歸去羣仙正草新宮銘汝應



奴隸蔡少霞我亦季孟山元卿

自注唐有夢書新宮銘者云紫陽真人山元卿

撰其畧曰良常西麓原澤東泄新宮宏宏崇軒轅巖又有蔡少霞者夢人遺書碑畧曰昔乘魚車今履瑞雲躅空仰塗綺輅輪囷其末題云五雲書閣吏蔡少霞書還須畧報老同叔羸糧萬里

尋初平

自注子由一字同叔

森蔚瑰偉以御風凌雲之氣行之是亦新宮銘所稱天籟虛徐鳳簫冷徹者耶

容齋隨筆曰東坡遊羅浮山作詩示叔黨其末負書從我四句坡自注用山元卿撰銘蔡少霞書碑二事

予按薛用弱集異記載蔡少霞夢人召去令書碑題  
云蒼龍溪新宮銘紫陽真人山元卿撰其詞三十八  
句不聞有五雲閣吏之說魚車瑞雲之語乃逸史所  
載陳幼霞事云蒼龍溪主歐陽棊撰蓋坡公誤以幼  
霞為少霞耳

十月二日初到惠州

彷彿曾遊豈夢中欣然難大識新豐吏民驚怪坐何事  
父老相攜迎此翁蘇武豈知還漠北管寧自欲老遼東

嶺南萬戶皆春色

自注嶺南萬戶酒

會有幽人客寓公

貶謫之地見如舊遊有終焉之志賢者固隨寓而安

白水山佛跡巖

自注羅浮之東麓也在惠州東北二十里

何人守蓬萊夜半失左股浮山若鵬蹲忽展垂天羽根  
株互連絡崖嶠爭吞吐神工自爐鞴融液相綴補至今  
餘隙罅流出千斛乳方其欲合時天匠麾月斧帝觴分  
餘瀝山骨醉后土峰巒尚開闔澗谷猶呼舞海風吹未  
凝古佛來布武當時汪罔氏投足不蓋拇青蓮雖不見

千古落花雨雙溪匯九折萬馬騰一鼓奔雷濺玉雪潭  
洞開水府潛鱗有飢蛟掉尾取渴虎我來方醉後濯足  
聊戲侮回風卷飛電掠面過疆弩山靈莫惡劇微命安  
足睹此山吾欲老慎勿厭求取谿流變春酒與我相賓  
主當連青竹竿下灌黃精圃

山記謂浮山即蓬萊別島洪水浮至依羅而止二山合  
體謂之羅浮本是不根之談前八韻據此翻騰而入無  
非為佛跡二字取勢以跌落古佛來布武一句耳後紀

浴於湯池從飢蛟渴虎飛電強弩數句之中參以醉後  
濯足二語忽然動魄驚心忽然掉臂徐步羅浮以風雨  
為合離匪此神筆莫傳其妙

唐庚語錄曰東坡詩叙事言簡而意盡惠州有潭潭  
有潛蛟人未之信也虎飲水其側蛟尾而食之俄而  
浮骨水上人方知之東坡以十字道盡云潛鱗有飢  
蛟掉尾取渴虎言渴則知虎以飲水而召災言飢則  
蛟食其肉矣

志林曰紹聖元年十月十二日與幼子過遊白水佛  
跡院浴於湯池熟甚其源殆可煮物循山而東少北  
有懸水百仞山八九折折處輒為潭深者礎石五丈  
不得其所止雪濺雷怒可喜可畏水厓有巨人迹數  
十所謂佛跡也

軾答陳季常書曰今日遊白水佛跡山上布水三  
十仞雷輓電散未易名狀大畧如項羽破章邯時也  
十一月二十六日松風亭下梅花盛開

春風嶺上淮南村昔年梅花曾斷魂

自注予昔赴黃州春風嶺上見梅花

有兩絕句明年正月往岐亭道上賦詩云去年今日關山路細雨梅花正斷魂

豈知流落復相

見蠻風蠻雨愁黃昏長條半落荔枝浦卧樹獨秀桃榔園豈惟幽光留夜色直恐冷艷排冬溫松風亭下荆棘裏兩株玉蘂明朝瞰海南仙雲嬌墮砌月下縞衣來扣門酒醒夢覺起繞樹妙意有在終無言先生獨飲勿歎息幸有落月窺清尊

秀色孤姿涉筆如融風彩露集中梅花詩有以清空入

妙者如和秦觀梅花詩云竹外一枝斜更好是也有以  
使事傳神者此詩海南仙雲嬌墮砌月下綳衣來扣門  
是也軾嘗稱秦觀詩有云西湖處士骨應槁只有此詩  
君壓倒觀詩豈能過之母亦自道其所得耳此題尚有  
和韻兩篇第二篇有紛紛初疑月挂樹耿耿獨與參橫  
昏二句最為洪邁所稱胡仔亦云三首皆擺落陳言古  
今人未嘗經道者第二首尤奇然細玩前篇究是不逮  
原唱也



遊齋閒覽曰凡詩之詠物雖平淡巧麗不同要能以  
隨意造語為工東坡在嶺南有暇字韻詠梅詩韻險  
而語工非大手筆不能到也

碧溪詩話曰用自已詩為故事須作詩多者乃有之  
太白云滄浪吾有曲相子棹歌聲樂天云須知菊酒  
登高會從此多無二十場明年云去秋共數登高會  
又被今年減一場坡赴黃州過春風嶺有絕句後詩  
云去年今日關山路細雨梅花正斷魂至海外又云

春風嶺上淮南村昔年梅花曾斷魂

新釀桂酒

搗香篩辣入瓶盆盎盎春溪帶雨渾收拾小山藏社甕  
招呼明月到芳樽酒材已遣門生致菜把仍叨地主恩  
爛煮葵羹斟桂醕風流可惜在蠻村

桂酒頌作於釀成之後有云釀為我醪淳而清甘終不  
壞醉不醒此詩乃作於方釀之時故但以搗香篩辣為  
言耳收拾小山藏社甕造語神奇

軾桂酒頌序曰吾謫居海上法當數飲酒以禦瘴而  
嶺南無酒禁有隱者以桂酒方授吾釀成而玉色香  
味超然非人間物也東坡先生曰酒天祿也其成壞  
美惡世以兆人主之吉凶吾得此豈非天哉故為之  
頌以遺後之有道而居夷者其法蓋刻石置之羅浮  
鐵橋之下非忘世求道者莫至焉

江郊

并引

惠州歸善縣治之北數步抵江少西有盤石小潭可

以垂釣作江郊詩云

江郊蔥朧雲外蒨絢碕岸斗入洄潭輪轉先生悅之布  
席閒燕初日下照潛鱗俯見意釣忘魚樂此竿綫優哉  
悠哉玩物之變

琢句全摹水經注碕岸二句乃從斗聳曲池及洄湍電  
轉環濤轂轉等句化出潛鱗俯見亦從新安江潭不掩  
鱗一句得來

正月二十四日與兒子過賴仙芝王原秀才僧曇

頽行全道士何宗一同遊羅浮道院及栖禪精舍  
過作詩和其韻寄邁迨一首

斷橋隔勝踐脫屣欣小揭瘴花已繁紅官柳猶疎細斜  
川二三子悼歎我年逝淒涼羅浮館風壁頽雨砌黃冠  
常苦飢迎客羞破袂仙山在何許歸鶴時墮毳崎嶇食  
松黃欲救齒髮弊坐令禪客笑一夢等千歲栖禪晚置  
酒蠻果粲蕉荔齋厨釜無羹野餉籃有蕙嬉游趁時節  
俯仰了此世猶當洗業障更作臨水袂寄書陽羨兒并

語長頭弟門戶各努力先期畢租稅

從荒寂處生情韻動崖谷

趙次公曰陽羨兒言邁也長頭弟則言迨也陽羨乃  
常州二子在常州也迨之長頭先生前集有詩可見  
其實

贈王子直秀才

萬里雲山一破裘杖端閒挂百錢游五車書已留兒讀

二頃田應為鶴謀

自注子直  
住鶴田山

水底笙歌蛙兩部山中奴

婢橘千頭幅巾我欲相隨去海上何人識故侯

用詞多以數目字大小相形清艷兩絕

藝苑雌黃曰水底笙歌蛙兩部山中奴婢橘千頭雖  
愛其語之工然南史孔德璋門庭之內草萊不剪中  
有蛙鳴或問之曰欲為陳蕃乎曰我以此當兩部鼓  
吹何必效陳蕃却無笙歌之說石林詩話曰子瞻嘗  
兩用孔稚圭鳴蛙事如水底笙歌蛙兩部雖以笙簧  
易鼓吹不礙其為意同至已遣亂蛙成兩部則兩部

不知為何物故用事寧與出處語小異而意同不可盡牽出處語而意不顯也

遊博羅香積寺

并引

寺去縣七里三山犬牙夾道皆美田麥禾甚茂寺下谿水可作碓磨若築塘百步閘而落之可轉兩輪舉四杵也以屬縣令林井使督成之

二年流落鼃魚鄉朝來喜見麥吐芒東風搖波舞淨綠初日泣露酣嬌黃汪汪春泥已投膝剡剡秋穀初分秧



誰言萬里出無友見此二美喜欲狂三山屏擁僧舍小  
一谿雷轉松陰涼要令水力供臼磨與相地脉增隄防  
霏霏落雪看收麵隱隱疊鼓聞舂糠散流一啜雲子白  
炊裂十字瓊肌香豈惟牢九薦古味

自注東哲餅賦饅頭簿持起搜牢九

要使真一流天漿詩成捧腹便絕倒書生說食真膏肓  
固是硬語排鼻湏看其字字鎔鑄而成有回萬牛之力  
有轉丸珠之巧

苕溪漁隱叢話曰老杜自我作古其詩體不一在人

所喜取而用之如東坡在嶺外游博羅香積寺同正  
輔游白水山皆古詩而終篇對屬精切語意貫穿此  
亦是老杜體如岳麓道林二寺行追酬故高蜀州人  
日見寄入衡州奉贈李八丈判官晚登瀛上堂之類  
概可見矣

李必恒曰按東晉餅賦有饅頭薄肚起洩牢丸之名  
而先生詩用作牢丸又自注中薄肚作薄持起洩作  
起洩又真一酒歌亦用起洩字想別有所據

連雨漲江二首

越井岡頭雲出山，  
猗江上水如天。  
牀牀避漏幽人屋，  
浦浦移家蜃子船。  
龍卷魚蝦并雨落，  
人隨雞犬上牆眠。  
只應樓下平階水，  
長記先生過嶺年。

急雨蕭蕭作晚涼，  
卧聞榕葉響長廊。  
微明燈火耿殘夢，  
半濕簾帷浥舊香。  
高浪隱牀吹甕盎，  
闌風驚樹擺琳琅。  
先生不出晴無用，  
留向空階滴夜長。

四月十一日初食荔枝

南村諸楊北村盧

自注謂楊梅盧橘也

白華青葉冬不枯垂黃綴

紫烟雨裏特與荔支為先驅海山仙人絳羅襦紅紗巾

單白玉膚不須更待妃子笑風骨自是傾城姝不知天

公有意無遣此尤物生海隅雲山得伴松檜老霜雪自

困櫨梨麤先生洗盞酌桂醕冰盤薦此蘋虬珠似聞江

鯉斫玉柱更洗河豚烹腹腴

自注予嘗謂荔支厚味高格兩絕果中無比惟江鯉

柱河豚魚近之耳

我生涉世本為口一官久已輕尊鱸人間何

者非夢幻南來萬里真良圖

絳羅紅紗語不露刻鏤之迹而形容備至江鯁河豚之比特以其同為異味非有深意陳敏政駁之固無謂胡仔辨之亦強作解事耳

遜齋閒覽曰東坡食荔支詩云海山仙人絳羅襦紅紗中單白玉膚予誦之未嘗不愛其體物之工然其後云似閩江鯁斫玉柱更洗河豚烹腹腴予意東坡未嘗至閩中亦不識真荔支其曰四月十一日是特廣南火山者耳故其比類僅與魏文帝庾信同科

苕溪漁隱叢話曰詩人詠物形容之妙近世為最東坡海山仙人四句誦此則知其詠荔支也坡詩自

注云予嘗謂荔支厚味高格兩絕果中無比惟江珧柱河豚魚近之耳又曰僕嘗問荔支何所似或曰荔支似龍眼客皆笑其陋實無所似也僕曰荔支似江珧柱應者皆憮然僕亦不解此所謂善於比類者若魏文帝庾信之葡萄乃至謬耳遯齋閒覽殊無鑒裁若言閩廣荔支高下不同則可若言東坡不善比類

則不可也

六月十二日酒醒步月理髮而寢

羽蟲見月爭翾翻我亦散髮虛明軒  
千梳冷快肌骨醒  
風露氣入霜蓬根起舞三人謾相屬  
停杯一問終無言  
曲肱殢簟有佳處夢覺瓊樓空斷魂

語簡而靜紙上有涼氣撲人

荔支歎

十里一置飛塵灰五里一候兵火催  
顛坑仆谷相枕籍

知是荔支龍眼來飛車跨山鵲橫海風枝露葉如新採  
宮中美人一破顏驚塵濺血流千載永元荔支來交州  
天寶歲貢取之涪至今欲食林甫肉無人舉觴酹伯游

自注漢永元中交州進荔支龍眼十里一置五里一候  
奔騰元亡罹猛獸毒蟲之害者無數唐元字伯游為林

武長上書言狀和帝罷之唐天寶中  
蓋取涪州荔支自子午谷路進入我願天公憐赤子

莫生尤物為瘡痍雨順風調百穀登民不飢寒為上瑞

君不見武夷溪邊粟粒芽前丁後蔡相籠加

自注大小  
龍茶始於

丁晉公成於蔡君謨歐陽永叔間君謨進  
小龍團驚歎曰君謨士人也何至作此事爭新買寵各



出意今年鬪品充官茶

自注今年閩中監司乞進鬪茶許之

吾君所乏豈

此物致養口體何陋邪洛陽相君忠孝家可憐亦進姚

黃花

自注洛下貢花自錢惟演始

君不見一段百端交集一篇之奇橫在此詩本為荔支發歎忽說到茶又說到牡丹其胸中鬱勃有不可以已者惟不可以已而言斯至言至文也

若溪詩話曰錢惟演為洛帥留守置驛貢花識者鄙之坡作荔支歎云洛陽相君忠孝家可憐亦進姚黃

花補世之語不能易也

容齋三筆曰東坡先生作文引用史傳必詳述本末有至百餘字者蓋欲使讀者一覽而得之不待復尋繹書策也如勤上人詩集叙引翟公罷廷尉賓客反覆事晁君成詩集叙引李邵漢中以星知二使者事上富丞相詩引左史倚相美術武公事荔支歎詩引唐羌言荔支事是也

苕溪漁隱叢話曰武夷溪邊粟粒芽誤指其地武夷

未嘗有茶茶之精絕者乃在北苑自有一溪南流至富沙城下方與西來武夷溪水合流東去劔浦固不可雷同言之建安北苑茶始於太宗朝太平興國二年遣使造之取象於龍鳳以別庶飲由此入貢至道間仍忝造石乳其後大小龍茶又起於丁謂而成於蔡君謨謂之將漕閩中實董其事社前十五日即採其芽日數千工聚而造之逼社即入貢工甚大造甚精皆載於所撰建陽茶錄

御選唐宋詩醇卷四十